

Sa angcū te

Älawng tea käni tärutä sa te

Angcū-a äte la awng y rawng. Ätete angxynlyng la ämaw äcae awng y. Ätete angxynlyng tea käving ma khu te vi. Känitä-a Sāthaw ma kaevang awng sy näkha särilo thui pa. Tukha kaevang bung sa pa dy. Sā te angcū käni-a, Sāthaw lä kärung hai käni bung sa pa. Äbaeni käni-a, Sāthaw lä tui tea täprei hethang käni khösang bung sa pa te vi.

“älawng lä angti angjang na aepra ea ämö awng saite äkung na cawng sy. Tukha honi angxynlyng na lä amäjäy kaethui kaethui aepu ö sy” näkha särilo thui pa dy. Äbäli käni-a Sāthaw lä käni, kärung, khösäning hai aely leng saite kätü na tea sämai nae käni, law hai tengpaw na bung sa pa. Äbangaw käni-a Sāthaw lä pangle hai khösang üng kähingsai mi angxynlyng na bung sa pa dy. Tukha honi na lä ämä ce amäjäy kaethui kaethui aepu ö hethang särilo thui pa.

Ätärü käni-a Sāthaw lä älawng üng rangcaw angxynlyng na tea sa te vi. Tukha Sāthaw ma honi na lä äma ce amäjäy kaethui kaethui älawng pre mityng qütä aepu ö hethang särilo thui pa dy. Tupyng-a Sāthaw lä älawng ngang hai khimi nawngmäcaw bung sa kha äni tea kähingsai mö pa. Äni lä khimi nawngmäcaw te üng mäna tangkhae hu la ea khimi nawngmädi bung sa pa. Tukha Sāthaw ma khimi nawngmäcaw ni khimi nawngmädi tea älawng pre angxyng bung pyng hethang aenae py pa dy.

Sāthaw lä äma sa saite angxynlyng tea ngai pa. Tukha äsäri käni-a Sāthaw lä aehae dy.

Mäny nae...

Sāthaw lä haidae awng kha äte angxynlyng tea sa te vi.

Adam ni Evi

Adam ni Eve lä awng angcū saite khimi lawngnetä vi. Änini lä hunghö sa angcū khimi dy. Tukha änini lä khimi amäjä cawngkhang üng änä-awi pä-ai dy.

Säthaw ma älawng ngang hai Adam bung sa kha äni üng nawryng-a kähingsai mö te kätü-a, äni lä äma sa saite rangcaw angxynlyng na bung Adam tea nähai kha mätü pa. Adam tea lä rangcaw na tea ämüng mäthi nae aenae py pa te vi. Tungaila honi angxynlyng na tea ämüng mäthi pyng-a, Säthaw lä Adam tähang äpy awng y te aedawng pa vi. Tukha Säthaw lä Adam tea I hai ea mäna tangkhae hu la kha Eve bung sa pa dy. Adam ma äni tea lä nawngmädi näkha ka pa. Ätephüng-a mei nädylä äni bung lä nawngmäcaw te üng dang te vi.

Säthaw lä änini tähang Eden Angkhaw sa pa. Honi Angkhaw thung-a lä äkung amäjä cawngkhang awngmang te vi. Säthaw ma Adam ni Eve tea honi äkung üng äthai na ca hethang py pa. Tungaila hawi hawi y mäny saite äkung üng äthai tea lä ca hai pa y. Känitä-a, Adam ni Eve lä Angkhaw thung-a awng hawi te kätü-a, Säthaw ma sa saite mi angxynlyng na hung-a canglailingky saite bärui lä Eve tea honi hawi, hawi y mäny saite äkung üng äthai ca hethang bärawi pa vi. Tukha äni lä äma hai mangtä awng saite änawngpaw tähang la py pa by dy.

Änini tea honi äkung üng äthai ca hethang py pa y ngaila, Adam ni Eve lä Säthaw üng älo tängai y kalä ca ea hunghö sa angcū hawi vi dy. Säthaw lä tüng te phüng-a, äni lä re nae kälang awng pa y. Änini bung angkhaw thung üng mätho hethang ni awng pa kae vi dy. Säthaw ma Adam ni Eve tea “Nang ni lä hunghö sa hawi te phüng-a, sa te vang lä dang hawi ai. Nang ni lä älawng-a mäsaе qа-a kälu sa kha käca känei dang ai. Nang ni lä naw mätang ai. Nang ni lä mätang ca-a hing pyng dylä dü hawi ai” näkha thui pa.

Mäny nae...

Hunghö aedung hai saite Säthaw üng älo tea tängai pa y te.

Ingkaesang babel

Älo awngmang te phüng
GEN Mäkung 11

Tuicäqing tho pyng-a Noah hai äma üng ingthungtakö na lä caw nade na aepu mang ö dy. Äni ce lä mityng haetä üng hai haetä mang-a aepüng kha awng ö te vi. Äni ce Babylon mityng-a tyng te kätü-a lä, äni ce lä honi mityng-a awng kha käni khösang-a tyng saite ingkaesang haetä sa he aedawng ö dy. Khimi ce üng bälung na lä leng bäräi te vi. Tukha äni ce lä aesangky saite Säthaw kätyng lawng haw hethang aedawng ö te vi.

Hini bälung leng saite lä äni ce üng aetüng saite vi dy. Säthaw lä märü-a cäqa kha khimi na sa te nung te kätü-a, äni lä tengxyng y kädawtho pa. Säthaw lä ämi lawngtä la lawng lawngtä älo aeqi ö y hethang sa kha äni ce üng ingkaesang sa te aenawng hai hethang aedawng pa dy. Tukha äni lä honi mityng üng khimi na tea älo käläng käläng aepe hai pa vi. Tudylä äni ce lä lawngtä hai lawngtä älo aethai ö pa y dy.

Khimi ce älo aepe hethang aethaw sa ö te kätü-a lä, xuxa saite älo lawng sö pa kae vi dy. Älo aetawng saite khimi qütä lä märü üng mangtä tho ö pang pa. Hini kätyng äni ce lä äma ce üng älo aepe ö qi kha älawng pre mityng qütä-a aehi sangxang ö dy. Hini lä ingkaesang tea ingkaesang “babel” näkha ka te phüng vi dy. “Babel” näsaite angcü üng älo daila awng ai.

Mäny nae...

Babylon üng khimi na bälung leng saite lä äma ce tea aene hai pa. Setan kätyng, äni ce lä Säthaw täthei awng he ngai ö vi. Mä-ai lä Areng üng maw-a bälung aemäneng he kae te vi.

Abraham üng aenai nae

Abraham bung lä ceng cawngkhang na üng pä-ai näkha älawng pre üng khimi qütä mäny bawi te vi. Tungaila Abraham lä caw nade na mänila dang y dy lyng näkha aedawng te kätü haetä awng.

Gen mäkung 17-21

Jangni-a Sāthaw tea ae-y khü saite khimi lawngtä awng. Äni lä kälü hawi kha äni tea lä Sāthaw ma tāhang kähawi py pa te vi. Bälung si he hawi te kähäetä lä äni lä äcaw awng pa y. Äni lä cāpaw ngai phi te vi. Sāthaw ma Sāthaw ma äni bung ceng cawngkhang na üng pä-ai lawng hai hethang älo aedo pa te kätü-a, Abram lä anghawtho kha älo aedo saite nade tea aering dy. Tungaila khösäning leng pyng-a Sarai lä cāpaw aepeng pa y vyng vyng pa.

Sarai lä äma äby dang haw hethang Aikuta pre üng äma üng mawsawng nawngmädi Hagar hai aepawng hethang Abram tea thui pa. Abram la Hagar hai aepawng pa dy. Tukha Hagar lä äjawng pawng pa dy. Äby aepeng te kätü-a, äby tea lä Ishmael näkha ka pa.

Hini lä älo aedo saite nade y. Ätephüng-a mei nädylä Sarai lä cāpaw lawngtä aepeng ai. Abram lä äni te mang hai tāhang kähawi dang ai näkha Sāthaw ma älo aedo te vi. Känitā-a, khimi lawngthungtä lä Abram tea dawnghang ly pa. Äni ce tea Abram ma awng hai pa. Honi khimi na lä Sāthaw hai kani pre angtautha ni vi. Äni ce ma Abram tea ämaw üng khösäning, hini kätü-a Sarai lä cāpaw lawngtä awng ai näkha thui ö pa. Sarai lä äma mätawng phi tea äcaw dang vi ai mei näte aedawng kha mänui pa vi. Sāthaw lä Abram ni Sarai tea ämüng kangthae py pa. Honi kani üng hai aetawng kha änini tea lä Abraham ni Sarah näkha mäny pa dy. Sarah näte lä “Aely leng saite anglaw” tea thui te vi. Äni lä ceng cawngkhang na üng nä-awi lawng ai.

Sāthaw lä äma üng älo aedo saite tea mätawng khü pa te vi. Tukha ämaw üng khösäning, honi kätü-a lä Sarah lä cāpaw lawngtä aepeng pa dy. Änini ma nade tea lä Isaac näkha ämüng mäthi hawi pa. Isaac näte lä “Mänui

saite”tea thui te vi. Ätephüng-a mei nädylä Sarah lä äma tea äcaw dang ai näkha Sāthaw ma thui pa te kätü-a, äni lä mänui pa te vi.

Mäny nae...

Sāthaw lä ae-y nae hawi vi. Äni lä äma üng älo aedo saite tea mätawng khü vi.

Jericho märü aene te

Isrelae khimi na lä Aikuta khimi na ma pyng te üng aelawi ngaila, äni ce lä älo aedo saite pre-a tyng ö hethang vi rawng.

Number Chap27, Deu 34, Joshua 1-6

Mosi ma Joshu tea äma üng mityng-a aety nae py pa. Joshu lä Sāthaw tea ri saite khimi lawngtä vi. Sāthaw ma Joshua tea Jordan tävaw aekae he khimi na tea aerü hai y-cy hethang thui pa. Honi lä äni ce ma ly kha Jericho märü tea pyng haw hethang vi. Joshua lä märü tea käny hethang sämeng lawngnetä bung mätaw pa dy. Änini tea lä Rahab näsaite nawngmädi lawngtä ma aedung hai pa. Rahab lä äni ce märü tea tei te kätü-a, äni hai äni üng ingthungtakö tea lä bäheng pa hethang makai pa. Änini la ngai pa dy. Rahab lä engpang teng-a awng kha änini bung lä äma üng thokhae kailae mang ärang mang-a mäqaw pa te vi.

Sāthaw ma khimi na tea “Ubädi hawtä khai saite aenai nae tengtae tea lä mäthykung lawng hawlainetä na ma aepö he kae. Tukha äni ce hai khimi angxynlyng na lä käni qütä baw qengtä üng kha käni tärütä tütü Jericho märü tea aevi ö hethang kae. Äsäri käni-a lä äni ce lä qeng säritä aevi ö he kae. Äsäri käni-a qeng säritä aevi pyng dylä, baw tüng hai ma Jericho märü lä aene ai”näkha näpa.

Joshua lä khimi na tea Sāthaw üng älo tea tängai hai pa. Tukha Sāthaw ma thui te kätyng aeting khaw pa dy. Joshua lä Rahab tea aedawng haile pa kha äni hai äni üng ingthungtakö na tea märü ärang mang-a mätö pa. Tupyng-a äni ce lä märü tea maisawi pa dy.

Mäny nae...

Säthaw lä äma üng khimi na maw-a ly kha äni ce tea täre aety te mäja hai pa te vi.